

Ɔwulɔ Gyankpapvɔ Paulo Lɔwanlɔn Sɔsɔ
Korintofɔ

¹ Mí Kristo Yesu sumbí ɔyɔpɔ Paulo ání Bulu létɔ mu apétó pɔ anɔ pío Sostene dé ɔwulɔ ánfɔ wanlɔn.

² Anɔdé mú wanlɔn sɔsɔ Bulu ɔpasua ání ibu Korinto wúlutɔ, Bulu lalé amú, bwé amú mu ahá. Amú Kristo Yesu babwé kulɛ, fé anɔ Wíe Yesu Kristo asúmpɔ́á bubu ɔyító féeé, Yesu Kristo gyí anɔ féeé Owíe.

³ Anɔ Sí Bulu mu anɔ Wíe Yesu Kristo bugyí mli buale, abuha mli iwilwii.

Anɔ Kristo ikulebwetɔ Oyúla

⁴ Ntedá Bulu pán brégyíbré, ahá mli Kristo Yesu kulɛbwe su alawá awitɔle há mli. ⁵ Tsúfée mú su mlilanyá iwɔ tógyítótó. Múá idun gyí mli tɔí pɔ mli asónbi féeé. ⁶ Inɔ lasúná ání asún amúú anulébláa mli tsú Kristo iwɔ ámu bu mútó. ⁷ Inɔ su ɔhétó atokiehé kugyíku medé mli hián séi ánfɔ mlihié mlidé ekeá anɔ Wíe Yesu Kristo obótsu ɔsós ba beɛ iwɔ ɔwan ɔkpa kí anfi. ⁸ Mu onutó ɔbówa mli ɔwonlɔn yófun eke amúú ɔbésankí bá begyi anɔ asún ámu, méni asvansu méetsiá mli iwɔ. ⁹ Ɔnɔkwaliɔ Bulu gyí. Mulétɔ mli ɔbée, mli mu Bi, ogyi anɔ Wíe Yesu Kristonyɔ mli bóbwe kulɛ.

Ɔpasua Ámutɔ ikulemábwé

¹⁰ Apío, nɔpɔ anɔ Wíe Yesu Kristo kókóli mli ání mli féeé mli bweé kulɛ, méni mluméedasaín. Mliha mli agywun ubwe kulɛ mli asun blíhé kugyíkvɔ. ¹¹ Mí apío, tóá svá nde asún ánfɔ blí gyí, akvá botsú Kloe abusuantɔ babláa mi beɛ, asún bubu mli nsiné. ¹² Beblí beɛ, mlitɔ aku mliaa, “Paulo anibuo.” Abambá beɛ, “Apolo anibuo.” Aku é beɛ, “Petro, butetráa ti mu Kefa anibuo.” Aku é beɛ, “Kristo anibuo.”

¹³ Nfíte mli, beye Kristoto? Paulo beda mántá oyikpalíhe amusu há mli, ntée mu dátó bəbə mli asú?

¹⁴ Nedá Bulu ipán ání Gaiο muα Krispu əma a, mmetrá bə mlitə əkuku asú. ¹⁵ Mú sv əhaa méetalí blí əbéε, mí idátó nəbə mu asú. ¹⁶ Ké! Nakáín, nəbə Stefana muα mu wóyító ahá é asú. Amú əma a, mméekaín ání netrá bə əhaa asú. ¹⁷ Kristo mówa mí ahá asúbə. Mboún əbéε, mbəda asun wankláán ámu əkan. Megyí ənəwanki pú anyánkpusa agywun nópublí mú, tsúfé ní nəpú mú blí mú á, túmi kukukuku imétrá tsiá Kristo oyikpalíhe amutə.

Bulu Túmi Pú Mu Nyánsa

¹⁸ Aní Wíε Yesu oyikpalíhesu lowu iwí asún ámu igyi mimlála há ahá ání budehi. Táme igyi Bulu túmi há aní ahá ání Bulu dé nkpa ání itamatá ha. ¹⁹ Tsúfé bəwanlín wá Bulu asún ámutə beε,
“Néyintá anyansapu nyánsa.

Mmóəhə amú agywun wankláán kuku.”

²⁰ Ní igyi alí á, múmú ntə onyansapu gyí? Ntə Mose mbla osunápú gyí? Əyí ánfítə nwéen agyípú me? Əyító ansitún mé, imegyí mimlála Bulu ansító?

²¹ Bulu lópu mu onutó nyánsa bwé mú. Nyankpusa méetalí pú mu nyánsa bí mu ekekeεke. Mú sv alapú aní mimlá əkan amúb anidéda ámu hə ahá ání bahə mu gyi nkpa. ²² Tsúfé osúna ání itsú Bulu wá Yudafo butekleá bəpúbí ání asún ámu bu mútə. Griikifo é á, nyánsa butekleá bəpúbí ání ibv mútə. ²³ Mú sv ní adá əkan aniaa, beda Kristo mántá oyikpalíhesu á, itəkúsú líi Yudafosv, igyi mimlála əmá bámbásófo é ansító. ²⁴ Táme ahá ání Bulu lalé, bugyi Yudafo pú Griikifo mú á, Kristo gyí Bulu túmi kponkponnti pú mu nyánsa há amú. ²⁵ Tsúfé Bulu mimlála igyi ansitínla dvn nyankpusa nyánsa. Mu pón é kúráá dvn nyankpusa əwunlín.

²⁶ Apíó, mlíkaii alíá mligyí bréá Bulu léti mli. Ahá butamabú mli ɔɔɔɔɔ ání mlilétin ansí. Mli ɔɔɔɔɔ mlímégyí iwí anyapú, ɔɔɔɔɔ é bumotsú abusuan kpikplitɔ. ²⁷ Bulu léle ahá ání buma nyánsa ɔyí ánfítɔ, méni ɔbópu amú sópa atiansipu. ɔlele ɔyí ánfítɔ apónpu é, méni ɔbópu amú wá awonlínpu pélitɔ. ²⁸ ɔlele ahá ání obú ma amúsú, pú amúá buma labi kuku ɔyí ánfítɔ, méni ɔbópu amú wá amúá obú bu amúsú pélitɔ. ²⁹ ɔlobwe mú fée ali, méni ɔhaa móotsu iwí mu ansítɔ. ³⁰ Bulu su mlii Kristo Yesunyo mlilabwé kule, alapú Kristo bwé ani nyánsa. Mulátsú ani áni ani asún da ɔkpa mu ansítɔ, alabwé ani mu ahá. Alahɔ ani lé lakpan nkpábitɔ, há anilagyi iwí. ³¹ Mú su fée alíá Bulu asún ámu léblí á, “ɔhagyíɔha ání ɔbéé, mótsu iwí á, ɔpúv tóá ani Wíe labwé tsu iwí.”

2

Kristo Da Mántá Oyikpalíhesu

¹ Mí apíó, bréá neba beda Bulu asun ñáinhé amu ɔkan súná mli á, mmɔpu ɔnɔwanki ntée nyánsa kuku bebláa mli Bulu asún ámu. ² Tsúfée bréá mbu mli wá á, nɔbwe agywun áni nótoí tsú Yesu Kristo pú mu oyikpalíhesu lowu nkule iwí. ³ Bréá neba a, mí awútó yóyóyó. Ifú de mí, ndekpunkí. ⁴ Megyí mí nyánsa pú mí ɔnɔwanki nɔpudá asún ámu ɔkan súná mli. Mboún ɔñé Wankíhé amu túmi léha asún ámu ulɔwankí mli. ⁵ Uleba ali, méni mlénya mli hógyi tsú Bulu túmitɔ, megyí nyankpusa nyánsatɔ.

Bulu Nyánsa

⁶ Táme ní nowíe ahá ání badan hógyi amvto wá á, ntɔpú Bulu nyánsa bláa amú asún amú. Megyí nde ɔyí kehetɔ nyánsa, ntée ɔyí ánfítɔ isv agyípu áni béba bɔhulú amú túmi klé. ⁷ Nyánsa ánfí anidé mú iwí asún blí ánfí igyi nyánsa áni Bulu lópuñáin asa ɔyí lebelun, áni ɔbópuwá ani numnyam. ⁸ ɔyí ánfítɔ otúmípu ɔkuku mébi nyánsa ánfí.

Ní bebi mú á, teki bumeda aní Wíe Onumnyampv amv mántá oyikpalíhesv. ⁹Táme fé alíá bōwanlín wá Bulu asún ámutō á,

“Tóá ansíbi mǎkúwun kí, asv mǎkónú kí,
umǎkúba nyankpusa agywuntō é kí a,
mú Bulu lalá yáí há mv adwepú ní.”

¹⁰ Táme anílabí ín, tsúfé alalé mú súná aní tson mv Ōje Wankíhé amvsv. Ōjé ámv tokwí tógyítótó kí, otélé Bulu asvn ñáíñhéá íbv otótótó kúráá súná aní. ¹¹ Ōhaa tamawun mv ba nwuntō, nkéti mv onutó Ōjé. Alí kén Bulu Ōjé ámv nkole tówun Bulu nwuntō ní. ¹² Aní mú á, Bulu lópv mv Ōjé wá anitō, megyí oyí ánfítō Ōjé bv anitō. Mboún Ōjéá itsú Bulu wá, méní abétalí nú itó ámvú Bulu lapókíé aní faan amv así.

¹³ Mú sv megyí aní onutó nyánsa asún anidé mli bláa. Mboún asún aní itsú Ōjé Wankíhé ámv wá. Mú anidépvlé Ōjéto onǎkwali asún así ní. ¹⁴ Ōhá aní Ōha Ōjé Wankíhé méetalí hō tóá itsú Bulu Ōjé ámv wá, tsúfé igyi mimlála mv wá. Ōhá aní Ōje Wankíhé bv mutō tónú asún aní Ōjé ámv déblí así. ¹⁵ Mutetalí tété tógyítótó nú mú así. Táme mv mú á, Ōhaa méetalí tété mv asúntó, nú mv así ekekekeke. ¹⁶ Nkálí íbǎbwe asa bétalí nú mú así? Igyi fé alíá Bulu asvn wanlínhé amv léblí obéé,

“Ma obétalí bí aní Wíe agywun?

Ma obétalí súná mv asún?”

Táme Kristo agywun bv anitō. Mú sv aní mú abétalí bí mv agywun.

3

Bulu Asúmpú

¹ Apíó, bréá neba mli wá á, mmetalí tóí mli ansító fé ahá aní Ōje Wankíhé bv amótó. Nebláa mli asún fé ahá aní amú agywun idun oyí ánfítō atósú, bumǎkúdan Kristoto.

² Nyópv-ntsu neha mli. Mmeha mli atogyihe onutó. Alí

bré ámutò á, mlumókófun atogyihe onutó gyí. ³ Tsúfè òyí ánfutò tsiátò itráa bu mlitò. Mlídè aba lu, mlidétré. Ní mlidè íni bwe mé, imosuná ání mli agywun trá dun òyí ánfutò atósú, mligyí fè òmátófo? ⁴ Mlitò aku mlíaa, “Paulo mbuo.” Mlitò aku é mlíaa, “Apolo mbuo.” Mbée, íni medésuná ání mligyí fè òmátófo?

⁵ Mbée, ma gyí Apolo, ntée ma gyí Paulo, só mlidétré aní su? Bulu asúmpú keke anigyí, mlulatsun aní ibitò mli mu ahógyipu. Anitò okugyíòku légyi gyuma ání Bulu léha mu. ⁶ Mílódu, Apolo lówulí mú ntsu, táme Bulu léha mú uledan. ⁷ Megyí odupú mba ntsu òwulípú lóbwe tótò. Bulu nkule tóbwe, tsúfè mutéhá mú itedan. ⁸ Odupú mba ntsu òwulípú fée bugyi kékée Bulu ansító, òbéka okugyíòku ikò mu bwehé ònó. ⁹ Agyómá ayòpú mía Apolo anigyí há Bulu. Mligyí Bulu ndò, mligyí mu obu é ní.

¹⁰ Bulu lówa awitòle há mí, bwé mí obu oyípu òtiansipu. Mú só nòpu abwi wá obu ámu ntswiasi, aha bambá betalí budepwe dínká músú ní. Táme òhagyíòha òkí wankláán obu ámu pwetó. ¹¹ Tsúfè òhaa méetalí wá ntswiasi bámbá dun mú ámúbú ida yaí, igyi Yesu Kristo amu. ¹² Ní òku òpú sika pepe o, sika futútú o, abwi ání ibu bíá o, nyí o, afitáa ntée ipí yi dínká ntswiasi ámuvsu á, ¹³ òbú ání kugyíku ibélin òwan eke ámúbú Bulu obégyi aní asún ámu. Ogyá òbòpυsò mú ki beε, òlòbwe mú wankláán. ¹⁴ Ní ogyá ámu mòhò obu ámu yíntá á, Bulu òbéda mu ipán. ¹⁵ Táme ní obu ámu lóhò a, òbéhie húli ató. Bulu òbóhò mu nkpa, táme obófufu fè òhá ání alasrí dali ogya plenplentò.

¹⁶ Mliméyín ání Bulu òtswékpa mligyí, Bulu Òhè ámu tsie mlitò? ¹⁷ Òhagyíòha ání oleyintá mu òtswékpa a, Bulu é obéyintá mu, tsúfè Bulu òtswékpa lówankí. Mu òtswékpa amu gyí mli á.

¹⁸ Òhaa mámlé mu iwí! Ní mlitò òku dé mu iwí ti òtiansipu nde òyí ánfutò á, ilehián ání òbóbwe mu iwí òha

mimláhe, ménì òbóbwe òtiansipv onutó. ¹⁹ Tsúfè òyí ánfítò ansítún igyi mimlála Bulu ansító. Fé alíá bōwanlín wá Bulu asvñ wanlínhé amvto bee, “Òtiansipv agywun laláhe Bulu tǎpókítá mv.” ²⁰ Bulu asvñ wanlínhé amv letrá blí òbéè, “Bulu yin ání òtiansipv agywun itépi ma labi.” ²¹ Ínì sv òhaa mápυ ansí dínká òhaasv tsú iwí. Mlibú tógyító. ²² Paulo o, Apolo o, Petro o, òyí ánfì o, nkpa ntée lowu o, nde o, òke o, mlibú mó fée. ²³ Kristo bú mlì, Kristo é gyí Bulu klé.

4

Kristo Sumbí Ayǎpú

¹ Ínì sv òhagyíòha otsú mó ání Kristo asúmbyi keke mía Apolo anigyí, Bulu lapú mv asvñ òhainhé amv agyómá wá anì ivotó. ² Tóá ihíe dehián gyí, òhá ání bapú agyómá wá mv ivotó obégyi ònǎkwali. ³ Mí mó á, ní mlitò akv ntée aha bambá bude mí pón ha kúráá á, imegyí tǎtǎ mí ansító. Mí onutó ó mmǎkóhá iwí pón ntée asv. ⁴ Nyin mí kluntó, táme imosuná ání mí asvñ da òkpa. Anì Wíe Yesu gyí mí asvñ ogyípó. ⁵ Ínì sv mlumákǎsí lé mlì aba ulá kpéfuvn anì Wíe òbáke amv. Mv òbówankí wólí okluntó atósó, lé anì agywun òwan, asa Bulu òbékanfó òhagyíòha alíá ilehián nì.

⁶ Mí apíó, mlì sù ndepv mía Apolo tsiátó súná mlì ató, ménì mlónu mó ámvú ahá buteblí bee, “Mlumányankí tóá bōwanlín tswisv” ámv asi, fówun mlumóowun òhaa tsú iwí. ⁷ Ma lébláa fv òbéè fudvñ òkv? Ntǎ fvbvá imegyí Bulu léha fú? Ní Bulu léha fú tógyító á, ntogyi sù fúde iwí tsu fé megyí ha beha fú?

⁸ Mlídékú ání mlilamwé! Mlilanyá iwí! Mlilawúna mlidé iwíe gyí. Mí sv mó á, tekì mlidé iwíe amv gyí lélé, ménì ania mlunyǎ abégyi iwíe amv. ⁹ Idé mí bwe fé Bulu lahá anì sumbí ayǎpú ánfì anulabwé òma agyápv fé ndoun

bakpá bəyómə. Tsúfě anulamí atə kɪhə há ɔyítə fěé, Bulu-abəpu múa anyánkpósa fěé. ¹⁰ Kristo sú anulabwé aha mimláhe, mli mú mlilatɪn ansí. Anɪgyí apónpu, mli mú mliɔwɔnlín. Ahá buɔe mli bu, anɪ mú ɔhaa tamabú anɪ. Megyí alɪ mlidé anɪ kú nɪ? Ntée megyí alɪ? ¹¹ Bófɔn séi á, akún múa ɔmewóli de anɪ, atatidatə anɪda. Buɔe anɪ atswé fɔlí, anumá ɔdikpa. ¹² Anɪteyírɪ iwɪ pú anɪ ɪbɪ yó agyómá púnýá anɪ atə hiánhe. Ní bəlwí anɪ á, anɪtoyúlá amú. Ní buɔɪn anɪsu é á, anɪtotomi. ¹³ Ní beblí anɪ iwɪ asɔn laláhe a, anɪtəpú ɔɔwe lé mú ɔnó. Bófɔn séi á, anulabwé wúna, buɔe ipí pɔtsítsá anɪsu ɔyí ánfɪtə.

¹⁴ Mmedé ɪnɪ wanlín púsúpa mli, mboún ndepɔtói kplá mli fé mí abí adwepó. ¹⁵ Tsúfě ní ahá mpím-dú (10,000) lósuná mli Kristo iwɪ asún kúráá á, ɔbakóle pé abí mliɔyí ɔɔtótó. Nəbwe mli sí Kristo Yesutə bréá neda asɔn wan-kláán ámu ɔkan súná mli. ¹⁶ Mú su nde mli kokóli, mlɪkastí mí tsiátó. ¹⁷ ɪnɪ su nde Timoteo wa sísí mli. Mí bí ní, ntəɔwé mu. ɔbu ɔnəkwalɪ Kristotə. Mu ɔbéba bekaín mli tsiátó oduá nəpu mbuo Kristo, ndepɔsúná ɔpasua kugyíkúá ɪbu ɔtɪnegyíɔtɪné nɪ.

¹⁸ Mlɪtə aku buɔe iwɪ tsu. Bukɪ beɛ, fíalɪ mmétrá ba mli wá ekekekeke. ¹⁹ Táme ní anɪ Wíe Yesu lótsulá á, ɪmóɔwa ɔpá kuku néba mli wá beki beɛ, asún keke iwɪ atsupú ánfɪ buɔeblí lóó, ntée lélé buɔu Bulu túmɪ. ²⁰ Tsúfě megyí asɔn blíhé keke Bulu iwíegyí ámu igyí, mboún Bulu túmɪ. ²¹ Ní nebá mli wá á, ntə mpóba? Mpú mɔli ba lóó, ntée ɔɔwe múa ɪklɔn lwiíhé?

5

*Mb*uato Iwɪ Asún

¹ Bahíé bebláa mɪ beɛ, mlɪtə aku buɔe atsi múa ayin asún wa. ɔmátófo kúráá buɔmedé mú odu bwe. Mlɪtə ɔku mú kúráá laswíí mu sɪ mu ka, ² ɪbu mli ansigyí! ɪma mli awɪrɔhə. Péli medé mli, ménɪ mlégýa ɔhá ánfɪ odu lé mli

ɔpasuato. ³ Íniá mlumédé mí wúun ó á, mbu mliṭo ɔhétó. Nahá ɔhá ánfí ɔbu tsiátó anfi odu ipón dodoodo, fé mbu unv. ⁴ Mliṭi ɔpasua ámu fia aní Wíe Yesu Kristo dátó. Nétsiá mliṭo ɔhétó, aní Wíe Yesu Kristo túmi é ibétsiá mliṭo. ⁵ Inu á, mliṭu mu wa ɔbunsám ibiṭo, oyinta mu ɔyulúv, méni Bulu ɔbóhɔ mu ɔkláa nkpa aní Wíe Yesu ɔbáke amv.

⁶ Kpaali mliṭé iwí tsu. Mluméyín aní bodobodotu-afá kpalobí téhá bodobodo amv féé itotú? ⁷ Íni sv mliṭe lalahe ɔbwepú anfi mliṭo, méni mli iwí bétun fé bodobodoá bumɔwa afá mótó, tsúfé alí mlihié mliṭyí ní. Megyí bodobodoá bumɔwa afá mótó, imotu butɔpúgyí Katsun Nke? Bamó aní Israelfɔsv Katsun Nketɔ Okúfabi, ogyi Kristo amv, lé aní nwunsv mbusuo há aní dodoodo. ⁸ Mú sv mliha apv bodobodoá imotu, igyí iwitún múa ɔnɔkwalíwa gyi Katsun Nke ámu. Mlumáha apv bodobodoá ilatú, igyí tsiátó laláhe múa lakpan gyi mú.

⁹ Nɔwanlín wá ɔwulú kvá nɔpsísí mliṭo mbée, mliṭápv mbua atɔpú gyi mba. ¹⁰ Megyí ɔyító mbua atɔpú, ɔnsipe awapú, awikplu ntée ikpi atswépv iwí asún neblí. Mómú teki mlédali ɔyí ánfíto asa mliṭówa amú mba ní. ¹¹ Tóá nɔwanlín sísi mli gyí, mliṭápv ɔhá aní ɔbée Okristoyin mgyi, táme ɔtɔtó mbua ntée ɔbu ɔnsípe, ɔtɔtswe ikpi, otesiá mu aba, ɔtɔbú ntá ntée otowí ató gyi mba. Mliha ɔhá ámu nyɔ mliṭáwa ibi gyi ató kóráá.

¹² Nto sù négyi ahá aní buma ɔpasua ámutɔ asún? Megyí ahá aní bubv mótó, bude lakpan ánfí odu bwe mboún asún lehián aní mlégyi? ¹³ Bulu obégyi ahá ámvú buma ɔpasua ámutɔ ámu mú asún. Táme bɔwanlín wá Bulu asvn wanlínhé amutɔ beɛ, “Mli mú mliṭgya lalahe ɔbwepú le mliṭo.”

6

Bulu Ahá Wɔlɛwɔlɛ Nsúné Asúngyí

¹ Ní mlitō ōku mu ba Okristoyin benyá á, ntogyi sō mlitōwá klvn pōya ōmátōfō asún ogyíkpa, mlitamapú ya Bulu ahá abubli mú? ² Mluméyín ání Bulu ahá obégyi ōyítō ahá fée asún? Ní mli obégyi ōyítō ahá asún á, mú ntogyi sō mluméetalí gyi mli wōlewulē nsuné asún? ³ Ntée mluméyín ání aní obégyi Bulu-abōpu é asún? Ntogyi sō animéetalí gyi ekekegyíeke asún mú? ⁴ Ní asún idá mli nsuné á, ntogyi sō mlitōpōya ōmátōfō asún agyípú amúú mli ōpasuafō butamabú ámu? ⁵ Nde asún ánfí wanlín sísí púsúpa mli. Mú sv ōtiansipv ōkule kúrāá má mli ōpasuafō ání ōbétalí gyi mu aba nsuné asún? ⁶ Ntogyi sō ōhógyipv ōbésamāa mu ba, mūa idvn kúrāá pú mu yélí ōmátōfō ansítō?

⁷ Alí ámuú asún ibv mli Akristofō wōlewulē nsuné ámu kúrāá ilosuná ání mlulagyi pón dodo. Ntogyi sō mli bá ōpú ulá gyí mli, ntée osísi mli, mluméesikíé? ⁸ Mli mboún latsvn gyankpá mlidé mli aba sisíi, mlidé lalahē pugyi mli aba? ⁹ Ntée mluméyín ání aha lalahē bumóowie Bulu iwíegyi ámutō? Mlumámlé mli iwí. Ahá ání butōwá atsi mūa ayin asún, ikpi atswépu, mbua atōpú, ayin ání butekle amú aba ayin, ¹⁰ awikplu, ōnsípe awapú, ntá abupú, ahá asiapú pú ahá asisípú buméenya ogyíkpa Bulu iwíegyi ámutō. ¹¹ Teki bré ámu a, alí mlitō aku mlgýí ní. Táme Bulu labie mli ntsu, alabwé mli mu ahá. Alatsvn mu Ōhē ámu pú aní Wíe Yesu Kristosv tsú mli ání mli asún da ōkpa mu ansítō.

Mli Ōyulú Powá Bulu Numnyam

¹² Mlitō ōku ōbétalí blí ōbé, “Mbu ōkpa bwé tótogyítō.” Ee! Táme nde mli bláa mbée, “Megyí mú fée ōbōwa labi.” Ōku é ōbéblí ōbé, “Mbu ōkpa bwé tótogyítō, támē mméeha tōtō méegyí misv.” ¹³ Ibv mútōá ōku ōbétalí blí ōbé, “Atogyihe bv unv há ipu, ipu é bv unv há atogyihe.” Ee! Táme mú fée ibéhi ekekú. Bulu móbwe nyankpusa há atsi mūa ayin asún wa. Mboún aní Wíe bú aní ōyulú, aní

ɔyulúv é bú aní Wíe. ¹⁴ Bulu lókusúa aní Wíe Yesu tsú afúlitō. Ɖóɔpu mu túmi ámu kúsóa aní é.

¹⁵ Ntée mliméyín mliaa, mli ɔyulúv igyi Kristo nyankpusa-oyí ámu iwí ató? Mú nkáli sù mpúv Kristo ɔyulúv yeda obu-ɔnó otsiápú ɔyulúv? Itsúv mív! ¹⁶ Ntée mliméyín mliaa, ní ɔku ɔpú ibi da obu-ɔnó otsiápú a, mua munyo ɔyulúv labwé kule? Tsúfé Bulu asv wánlínhé amu léblí ɔbé, “Oyin ámu mua ɔtsi ámu babwé ɔyulúv kule.” ¹⁷ Táme ní ɔku mua Kristo bɔbwe kule a, mua munyo babwé ikule ɔjéto é.

¹⁸ Mlumápléi atsi ntée ayintō. Lakpan kugyíkúvá ɔha tɔbwé tamakúsú líí mu ɔyulúsv. Táme ní ɔwá atsi móa ayin asún mó á, alabwé lakpan ání ilókúsú líí mu onutó ɔyulúsv. ¹⁹ Ntée mliméyín mliaa, mli ɔyulúv gyí Ɖhe Wankíhé amu ɔtswékpa obu? Bulu lópu mu há mli, otsie mlitō. Mú sv megyí mlibú mli iwí. ²⁰ Ibíá kpékpélékpé Bulu lóhō mli. Mú sv mlipu mli ɔyulúv wa Bulu numnyam.

7

Akúlu Mva Aká, Akpanku Pú Asvrapu Atosunáhé

¹ Nayó asv fitéhé amúv mliwánlín sísí mí ámvto kí a, Ee! Ibv aláá oyin móɔpu ibi da ɔtsi. ² Táme mbvatō ladubi sv oyinyíoyin onyá mu onutó ɔká, ɔtsigyíɔtsi é onya mu onutó okúlu. ³ Ilehían ání okúlu obégyi ɔkátsiá mbla féesú ha mu ka, ɔká é ɔbóbwe mó alí ha mu kulu. ⁴ Megyí ɔtsi bú mu iwí, mu kulu bú mu. Alí megyí oyin é bú mu iwí, mu ka bú mu ní. ⁵ Mú sv mlimákiná aba ɔdikpa ha, nkéti mli abanyó ámu mlilatsúlá ání mlétsiá nke kpalobí, méní mlétsiá bó mpái, asa mlélayó aba wá. Mliwun aba mó ɔma, méní Ɖbunsám méetalí sō mli kí, ní mlimétalí kítá iwí.

⁶ Ɖkpa ida ání mlóbwe mó alí, táme megyí ɔhíé igyi.

⁷ Mí nkule sv mó á, teki mlétsiá kpanku fé mí, táme

ɔhagyíɔha bu múá Bulu lópu kíe mu. Ɖmɔbwe aní fée kékée. Ɖhagyíɔha mua mu kle.

⁸ Séi nde akpanku múa asurapu bláa mbée, ní bótsulá tsíá mí atsiábi a, teki ibu alé. ⁹ Táme ní mluméetalí kítá iwí ntée gyi mli iwísv mú á, mlitsia akúlu múa aká, dvn aní mlénatí dá tsvn.

¹⁰ Táme akúlu múa aká awíe mú á, mbla kv bu unvá megyí mí, mbóun aní Wíe Yesu lówa há amú. Ɖbée, ɔká mákiná mu kulu. ¹¹ Táme ní ɔmáín mu kulusu a, ɔkíta iwí ntée oyínki yɔ mu kulu wá. Okúlu é mákiná mu ka.

¹² Mli aha tráhe mú á, mí onutó dé mli ínı bláa. Megyí anı Wíe Yesu dé mú blı. Nı ohógyıpu yínhé tsía ɔtsía omegyí ohógyıpu, táme ɔtsı ámu latsúlá anı mua munyɔ bétsiá á, ɔmákiná mu. ¹³ Nı ohógyıpu tsíhé é tsía oyin anı omegyí ohógyıpu, táme alatsúlá anı mua munyɔ bétsiá á, mu é ɔmákiná mu. ¹⁴ Tsúfé ohógyıpu tsíhé ámu sv Bulu ɔbóhɔ mu kulu. Alı kén ohógyıpu yínhé ámu sv Bulu ɔbóhɔ mu ka é ní. Nı megyí alı á, Bulu móotsu amú abı anı amú asún da ɔkpa mu ansító, táme ínı sv Bulu latsú amú anı amú asún da ɔkpa mu ansító. ¹⁵ Táme ní okúlu ntée ɔká anı omegyí ohógyıpu dékléá obékiná mu tsiába ohógyıpu a, ohógyıpu amv osıi mu ɔnatı. Mbla kuku meklı mu, tsúfé Bulu létı anı ɔbée, abétsiá iwılwiıtɔ. ¹⁶ Ohógyıpu tsíhé, fuyin ní fú ɔbóhɔ fú kúlu nkpa? Ntée ohógyıpu yínhé, fuyin ní fú ɔbóhɔ fú ká nkpa?

Tsia Alıá Fúgyi

¹⁷ Mú sv ɔhagyíɔha ɔpúv tóá anı Wíe Yesu léha mu asa Bulu létı mu tsia. Múgyı tóá ntebláa ɔpasua kugyıku ní. ¹⁸ Nı ɔkv létın keté asa Bulu létı mu a, ɔmálayínkı yébwe mú iwı tɔtɔɔtɔ. Nı ɔkv é métın keté asa Bulu létı mu é á, ɔmáyétn. ¹⁹ Ketétın ntée ketémátın megyı tɔtɔ. Bulu mbla ámvsv gyı mbóun gyı asún. ²⁰ Ɖhagyíɔha otsiá alıá ogyi asa Bulu létı mu. ²¹ Ɖkpábi fuyi asa Bulu létı fú?

Imáhan fu. Táme ní òkpa ibá ání fégyi iwí á, kusu músú. ²² Tsúfè ní òkpábi fúgyi asa aní Wíe létí fú á, alahá fagyi iwí. Alí kén òhá ání otsie mu iwísw asa aní Wíe létí mu é gyí òkpábi séi há Kristo ní. ²³ Bulu lóhò mlí ibiá kpekplékpeé. Íní sv mlumábwe mlí iwí nkpábi há anyánkpósa. ²⁴ Mí apió, alíagyíalíá òhagyíòha gyí asa Bulu létí mu a, òpúb mú alí tsia.

Mbitebí Mú a Asurapv

²⁵ Mlí mbitebíá mlímókútsiá akúlu kí mú á, mma mbla kukvá itsú aní Wíe wá há mlí. Táme aní Wíe mva mu nwewúun, alahá mí nyánsa ání mlétalí hò mí gyi. ²⁶ Asún ání nde há mlí gyí, òyító lawá ònlun séi. Mú sv nahogyiá ibu aléá òhagyíòha obétsiá aliá otsie yaí. ²⁷ Ní fúbv òká á, mákiná mu. Ní kpankv fúgyi é á, mátepi tsia. ²⁸ Táme ní fetsiá òká á, fomòkúbwé lakpan. Ní obitebíá òmòkútsiá okúlu kí é otsiá a, òmòkúbwé lakpan. Asun wunheá ibéba tekí ndetsu kósú akúlu múa akású. Mú sv nde íní blí.

²⁹ Mí apió, múa ndeblí gyí, bré itinbí ilasí. Íní sv tsú séi á, òhá ání òbv òká òbwéé fè òhá ání òma. ³⁰ Òsun ígyi o, òdwe ígyi o, iwunya ígyi o, òbwéé iwí fè asvansv medín musv. ³¹ Ahá ání bvdé òyí ánfítò ató pvbwé tòkv bumápv amú ansí fèé dínká músú. Tsúfè òyí ánfí pú mútò ató fèé béba bòtsun.

³² Mmedékléá asún iháan mlí. Òhá ání òma òká tòpú mu ansí dínká aní Wíe agyúmású, méní obégyi mu ansí. ³³ Táme òká mu wie mú tòpú ansí dínká òyító atósú, méní obégyi mu ka ansí. ³⁴ Mú sv mu agywun tòbwé anyò. Alí kén òtsi kpankv é tesí mu iwí há aní Wíe, òyulúb múa òjétó fèé, méní obégyi Bulu ansí ní. Táme okúlu mu wie mú tòpú mu ansí dínká òyító atósú, méní obégyi mu kulu ansí.

³⁵ Mlí yilé sv nde asún ánfí blí. Mmedé mlí itin ka. Mboún nde kléá mlíbwéé tóá ida òkpa, amlisi mlí iwí fèé há aní Wíe Yesu.

³⁶ Ní oyin ɔ́fíté ɔ́tsɪsɪ, owun ání ɔ́méetalí kítá iwí, ɔ́tsi ámu é déklé ɔ́dan tsɪn a, ɔ́yékpáín mu. Megyí lakpan igyi.
³⁷ Táme ní ɔ́lábwé agywun ání oméetsiá mu, ɔ́bétalí kítá iwí tsíá kpanku á, ɔ́bu ɔ́kpa bwé tóá odeklé. Ní ɔ́bétalí kítá iwí á, múmú ɔ́kíta iwí. Ibu alé ɔ́n. ³⁸ Ibu aléá obétsiá ɔ́ká, táme ní ometepí tsíá a, ibu alé ɔ́n.

³⁹ Mbla léklí ɔ́tsi ání oméekiná mu kulu yófun mu owuké. Táme ní oyin ámu owú á, ɔ́bu ɔ́kpa tsíá oyin ání odeklé. Táme ilehián ání ɔ́há ámu ɔ́bóbwe Okristoyin. ⁴⁰ Mí nkule sɪ mú á, ní otsie kpanku á, ansí bégýi mu ɔ́n. Nyin ání Bulu ɔ́h'é ámúú ibu mitó ámu sú natálí nde mli asún ánfí bláa.

8

ɔ́kpítá Atogyihe

¹ Mliha abli ɔ́kpítá-ató gyí iwí asún ámúú mlilówanlín sísí mí ámu.

Mlidéblí mliha, “Ani f'éé anyin asún.” Ibu mótó, táme mliɪbɪ ání asúnɪ t'ehá ɔ́ha totsú iwí, ɔ́dwe é itehá ɔ́ha tedan.

² Ní ɔ́ku ɔ́b'éé, muyin asún dubi a, ɔ́mákúnyá bí tóá idehián.

³ ɔ́há ání ɔ́tɔ́dwé Bulu á, Bulu é yin mu.

⁴ Mú sɪ nkáli anidéblí tsú ɔ́kpítá ató gyí iwí? Ani f'éé anyin ání ɔ́kpi mégyí tɔ́tɔ́tɔ́. Anyin ání Bulu ɔ́kule pé é bu unv, ɔ́kuku trá ɔ́ma ɔ́tinetine. ⁵ Íniá ikpi múa túmi tsɔ́tsɔ́tsɔ́ bubu ɔ́sú múa así ó á, ⁶ aní mú anyin ání Bulu ɔ́kule pé bu unv. Múgyí aní Sí, ɔ́sú múa así ɔ́bwepú. Mu anitsie nkpa há. Aní Wíe ɔ́kule pé é bu unv. Múgyí Yesu Kristo. Músu Bulu lótsun bwe tógyító. Mu kén sɪ anitsie nkpa ní.

⁷ Táme megýí Akristofó f'éé yín alí asún ánfí. Ikpísúm lamántá amú dodo. Íni sɪ ní begyi ɔ́kpítá-ató á, buɔ́de mú tsu ání basúm ɔ́kpi ámu ni. Mú sɪ ifin lada amú, tsúf'é bumákúdan hógýitá. ⁸ Megýí tóá anitegyi sú ania

Bulunyo nsiné bōwa alé. Nto anulégyí o, nto anumégyí o, tōtō meyintá aní iwí.

⁹ Táme mlíkí wankláán ání òkpa ánfí mlibu gyí òkpitò-atò ánfí uméha òhá ání òmòkúdan hògyitò òmédida. ¹⁰ Ní òhá ání òmòkúdan hògyitò owun fú ánfí fée fuyin asún, fude atò gyí òkpitò á, ibu alé? Mómú yée fude mu ateto-onlun wa fée, ogyí òkpitò atò ánfí mu onutó oyin ání uma ale anfi ní o. ¹¹ Mómú fapú fú asúnbí mlé fú pío wá. Fahá fú pío ánfí òmòkúdan hògyitò, Kristo lówu há mu anfi lafí. ¹² Ní fapú ilá gyí fú pío Okristoyin ání òmòkúdan hògyitò, fèhá mu òbwé tóá oyin ání uma ale á, Kristo fapú ilá gyí a. ¹³ Mú su ní tóá négyi íbèha mí pío Okristoyin òbóbwe lakpan á, mméetepí trá gyí iye ekekeke, méní uméha mu òdida.

9

Sumbí Ọ̀yọ̀pú Túmí Pú Mú Gyumagyihe

¹ Mlíkí mlíhaa mmetsie mí iwísu? Ntée megyí sumbí ọ̀yọ̀pú ngyi? Mmòkòwun aní Wíe Yesu kí? Megyí mí gyumagyihe sù mlílamlí aní Wíe klé nde? ² Ní mmegyí sumbí ọ̀yọ̀pú há aku á, mlí mú mlíyin ání sumbí ọ̀yọ̀pú ngyi. Tsúfè íniá mlígyí Akristofò á, ilegyi adánsie ání aní Wíe sumbí ọ̀yọ̀pú ngyi.

³ Íni gyí tóá ntòpùlé mí iwí ònó súná ahá ání butelé mí ilá ní. ⁴ Mía Barnaba mú animágyi atò, nu ntsu? ⁵ Animá òkpa tsía ohógyipu, kpá mu buo iwí, fè sumbí ayọ̀pú atráhe amu pú aní Wíe apíó múa Petro aná? ⁶ Ntée mía Barnabanyò mú ayòó agyómá kí aní iwísu? ⁷ Isá òkòpú onutó téká iwí ikò? Ekekeke! Ọ̀dòtòpù òmòmu tamagyi mu ndòtò-atò? Mbwi ọ̀yáíró òmòmu tamagyi mu òbwi yáíhè?

⁸ Anyánkpúsa agywun ndepublí íni? Yée Mose Mbla óó iléblí alí á? ⁹ Tsúfè bòwanlín wá Mose Mbla ámutò bée,

“Butamawá onantswieá oðe ayó da onó ikan.”* Fahogyi fεε nnantswie iwí dé Bulu hián só oðeblí asón ánfí? ¹⁰ Megyí aní só oðe asón ánfí blí? Aní só oðe mú blí a. Bowanlín wá Bulu asón ámvtò bæe, “Iflé owoópu mua ató okpòtípú ffé bugyo tóá bénya tsú agyómá ámóú bayó ámvtò.” ¹¹ Ní anilabláa mli ason wankláán ámu, igyi oñétó abíá aniladú wá mltò á, aní mú animá okpa nyá aní oytó atohiánhe tsú mli wá? ¹² Ní aku bubu okpa nyá ató tsú mli wá á, animá okpa dun amó?

Táme animótsu kuku lé ínutò. Anilapó kluntò pisii hò tógyító, méni anumóopu tótòtò tin Kristo ason wankláán ámu okpa. ¹³ Mluméyín mlíaa, Bulu oswékpa unu agyómá ayópú é bubu ogyíkpa unu? Ntéε mluméyín ání afòdiε-asubwi amu asi asúmpú butegyí mú asi ató? ¹⁴ Alí kén aní Wíε léhiε ání mu ason wankláán ámu okan adapú é bugyíí ató tsu ahá ání bude labi nya tsú asón ámvtò wá ní.

¹⁵ Táme mí mú mmókúpú alí okpa ánfí mbu anfi nyá tótò tsú mli wá. Megyí bæe ndekléá néfi mú asi, só nde asón ánfí wanlín sísí mli. Ibu mí aléá nówu, dun ání nóhulí itó ánfí nópotsú iwí ánfí. ¹⁶ Táme ní nde ason wankláán ámu okan da a, imegyí tóá nópotsú iwí. Tsúfεé ohié igyi há mí. Bulu oðébití mí isu ní mmeda mú okan. ¹⁷ Ní mí onutó léblí mbéε nóbwe mú á, teki Bulu oðéda mí ipán. Táme megyí mí onutó apétó nde mú bwe. Okpábi ngyi, Bulu lóbu mí onokwalupu pú agyómá ánfí wá mí ibitò. ¹⁸ Ikòká mòmumu nénya tsú mótó ngya? Múgyí néda ason wankláán ámu okan, buméeka mí tótò. Teki mbu okpa púkle tòku há mí iwí, táme mmóobwe mú alí.

¹⁹ Ntsie mí iwísu. Mma ohaa asi, táme nabwé iwí okpábi há ohagyíoha, méni nékpa ahá tsòtsòtsò ba Kristo. ²⁰ Ntòbwé iwí fεé Yudayin ní mbu Yudafòtò, méni nétalí nyá

* ^{9:9} Deut. 25:4. Kí ató táanhéá bu ifon XXX, (1 Ti. 5:18). Mú asi gyí, “Butamalé okwén pú ibi tsítisi oşulúto.”

Yudafō ámu, Mma Mose mbla ası, táme ntəbwé ıwı fé ahá ání bubu mú ası, méni nétalı nyá amótó aku. ²¹ Alı kén ní mía əmátófá buma Mose mbla ası anuná á, ntəbwé ıwı fé amú, méni nétalı kpá amú ba Kristo ni. İni medésuná áni mma Bulu mbla ámu ası, tsúfé ntobú Kristo mbla ámu. ²² Ntəbwé ıwı fé ahá áni amú hógyı ənó ma ənlun, méni nétalı há amú bédan Kristotə. Ntedamlı ıwı əkpa ətsan-ətsansu há ahá féé, méni nétalı kpá amótó aku ba Kristo.

²³ Asun wankláan ámu sú ntəbwé İni féé, méni mí é nénya ogyıkpá mótó. ²⁴ Mlikan áni ní ahá busrı a, okugyıəku teyırı ıwı, táme əbakúle tégyı ısu, butekıé mu ató? Mli é mliyırı ıwı srı, méni mlégyı ısu, békıe mli ató. ²⁵ Əsrı otsıpú okugyıəku tekıtá ıwı, méni əbésrı púhə ıdá áni itamatsıá yó. Táme anı mú anıdé İni bwe, méni abóhə ıdá áni ıməfwi ekekeke. ²⁶ İni sv megyı kpaalı nsrı. Mı ansı dın təkvsu. Ntamatswı atswé wá afútó. ²⁷ Ntesen ansıtó, bwé mí ıwı əkpábi, méni ní nedá asún ámu əkan súná ahá ta á, Bulu méεbláa mı əbéε, nabwé tsıtsá.

10

İkpısum ıwı Əláda

¹ Mı apıó, ndekléa mlibú tóá Bulu lóbwe há anı anáın amu féé bímbı ámu. Əleha agyinde lobun amú féésú, əleha əpu pepε bunkpato léε, əlekpa amú féé tsun əpu amvtə. ² Bulu lópu agyinde mba əpu amu bó amú féé asú, púsúná áni bugyı Mose abúopu. ³ Amú féé begyı əhétó atogyıhe oloku əkule amu. ⁴ Bonu əhétó ntsu oloku əkule amu tsú butá amúb ılekpa amú ámvttə. Kristo gyı butá ámu ni. ⁵ Táme İni féé əma a, Bulu ansı megyı amú ədudvə ıwı, əlehi amú dimbí ámuvsu unu.

⁶ Ntobı ánfı ıleba amúsú ánfı féé igyı atosúanhe há anı, méni amú lalahε amu odu bwe méεdınká anı əwólı, ⁷ ánumóosúm ıkpı é fé amú. Tsúfé Bulu asun wanlınhé amu ıleblı əbéε, “Ahá ámu betsiá ası gyı ató, nu ntá, kúsú

kóm.” ⁸ Mlumáwa atsi múa ayin asún fée alíá amótó aku bəbwe, íleha amótó mpím advanyo-sa (23,000) benya lowu ekewóle. ⁹ Mlumáha aso Kristo kí fée alí amótó amótó aku bəbwe, awə bodundun amó mó ámu. ¹⁰ Mlumále Bulu ílá fée alíá amótó aku bəbwe, Bulu lópu əbəpu sísí, ələbəmə amó.

¹¹ Ntobí ánfí íleba amósú fée igyi atosúanhe há aní. Bəwanlín mú tswí, púdá aní ahá ánfí əyí ənóməbí latú aní ánfí əlá.

¹² Mú sv ní fəki fəe fulí kínkíínkín Kristo hógyito á, kí wankláán, méni fóméedida. ¹³ Bí ání fú isóki amv mətəsvn ətsan há aha tráhe klé. Ənəkwalipu Bulu gyí. Əméeha isókíá ídvn fv íba fvsu. Táme ní fowíé isókito á, Bulu obósuná fú əkpa ání fótəsvn mósú tálí líí mú ənó, méni fédali mótó.

¹⁴ Mú sv apíó adwepú, mlumáwa íwí íkpísumtó ekekekeke. ¹⁵ Atiansipu mligyí. Mú sv mli onutó mliyo asún ánfíto amlíki. ¹⁶ Ní adá Bulu ípán, anu aní Wíe Yesu əpúnúasi ewe ámvto ntá á, imosuná ání ania Kristo obugya labwé kule? Ní abíá bodobodo amv é ye aba á, mú é imosuná ání ania mv əyulúv labwé kule? ¹⁷ Ínía aní tsó ó á, bodobodo ipin kule anitegyi. Mú sv aní fée anulabwé əyulúv kule fée bodobodo ípín ámu.

¹⁸ Mlipukí Israelfó, megyí ahá amótó butegyí afədiə-ató ámu tóbwé kule afədiə ámu bətót? ¹⁹ Mú sv nkáli mí asún ánfí desuná? Blí ndeblí mbée, íkpi ntée atogyihe amótó bapóhá amó igyí amv íbv labí? ²⁰ Ekekekeke! Tóá ndeblí gyí, ní akpípu behá íkpi igyí a, əhe laláhe bəpvhá, megyí Bulu. Mú sv mmedékléá mlia əhe laláhe mlóbwe kule. ²¹ Mluméetalí pú aní Wíe ewe tin ənó, láyópu əhe laláhe ewe é tin ənó. Mlia Kristo mluméetalí wá íbv gyi ató, mlia əhe laláhe é amlíwa íbv gyi ató. ²² Ní abwé mú alí á, anumóowa Bulu əbló fée Israelfó? Ntee anikíá aníbv əwvnlín dvn Bulu?

²³ Ahá buteblí bəe, “Aníbv əkpa bwé tógyító.” íbv mótó alí, táme megyí mú fée bv labí. Fudeblí fəe, “Aníbv əkpa

bwé tógyító.” Táme megyí mú fée tóbúa aní. ²⁴ Mlumáki mli nkule klé, mboún mliki mli aba é klé.

²⁵ Tóá mliwée gyí, mliwi ibíasú iye kugyíku. Mlumáfité mú iwí asvansu, mli klun é umáha mli pón. ²⁶ Tsúfé bōwanlín wá Bulu asón ámutō be, “Bulu bú oyi múa mótó ató fée.”

²⁷ Ní omátóyín otí fú ató ogyíkpa, iletsiá fú á, fayó. Táme ní foyó á, máfité mú iwí asvansu, fú klun é umáha fú ipón.

²⁸ Táme ní oku obláa fu obée, “Okpito-ató igyi” á, alíá uméehan ohá ámu su mágyi ató ámu. ²⁹ Megyí alíá ibéhan fu su, mboún ohá ámu su. Múú ntogyi sú tóá oku désusúu ibétin mí iwígyi okpa?

³⁰ Ní ntédá Bulu ipán atogyihesu asa ntegyi mú á, ntogyi sú oku obéle mí ilá ató ámu su?

³¹ Mú su ní fudegyi o, fudenúu o, bwe mú fée pwa Bulu numnyam. ³² Mlumáha mli tsiátó itin Yudafo pú Griikifo ntée Bulu opasua ámu Kristo wá ba okpa. ³³ Ntamakle mí nkule yilé. Tógyítóá ntobwé á, ntóbó mbódí aní néha ahá ansí bégyi amú, méní Kristo obóhō amó nkpa.

11

¹ Mlikasi mí tsiátó, fé alíá mí é nekasí Kristo klé.

Alíá Atsi Bópútsiá Opasuato

² Mí apíó, ntekánfú mli, tsúfé mli ansí dun mísú. Mli débwe dínká Kristo atosunáhé amú nōpvhá mli ámu su. ³ Táme ndekléá mlinúu mú asi aní oyingyíoyin bu Kristo asi, otsigyíotsi bu oyin asi, fé alíá Kristo é bu Bulu asi. ⁴ Iní su oyingyíoyin aní obun ató nwun asa ode mpái bō ntée ode asón aní Bulu lapúwá mú onó blí médé Kristo bu. ⁵ Táme otsigyíotsiá omeklí nwun asa ode mpái bō ntée ode asón aní Bulu lapúwá mu onó blí é médé mu kulu bu. Igyi fé alakpá nwun. ⁶ Ní omóopu ató klí nwun á, mómú okpáa mú. Táme ní otsi okpá nwun, ibu mu péli a, opúu

atō klí mósú. ⁷ Bulu lóbwe oyin fé mu iwí, pówá mu iwí numnyam. Mó su mehián ání obópu atō bun nwun asa obósum Bulu. Táme ɔtsi mó á, Bulu lóbwe mu pówá oyin numnyam. ⁸ Tsúfé oyin médalí tsu ɔtsitɔ, ɔtsi mboún lédalí tsú oyintɔ. ⁹ Megyí ɔtsi sù Bulu lópwe oyin, mboún oyin sù ɔlɔpwe ɔtsi. ¹⁰ Íni su ilehián ání ɔtsi obéklí nwun, púsúná ání ɔbu túmi asi, tsúfé Bulu-abɔpu buɔe mu kí. ¹¹ Íniá ania Kristonyɔ anilabwé kule su á, ɔtsi léhián oyin, oyin é léhián ɔtsi. ¹² Tsúfé alí ámúb ɔtsi gyankpapu lédalí tsu oyintɔ ámu a, alí kén ɔtsi é lókwí oyin ní. Táme Bulu lóbwe tógyító.

¹³ Mli onutó mliɔ asún ánfítɔ amlíkí. Ibu aléá ɔtsi méeklí nwun asa obóbɔ mpái há Bulu? ¹⁴ Fé alhá Bulu léle ɔyító á, uma aléá oyin obési mu imi ibówa iwí fé ɔtsi klé. ¹⁵ Imi túntín igyi numnyam há ɔtsi, tsúfé Bulu lópu mó há mu fé nwun-abúntɔ. ¹⁶ Táme ní ɔku dé mó iwí nwéen gyí a, asún ání mbu blí gyí, mmotsulá dínká kokusu dun íni. Alí kén Bulu ɔpasua atráhe féé bumotsulá dínká mósú ní.

ɔpúnúasiɔ

(Mateo 26:26-29; Marko 14:22-25; Luka 22:14-20)

¹⁷ Mméekanfú mli asún ánfí nebá bebláa mli ánfí mótó. Tsúfé yilé kuku tamadálí tsu mli ifíatɔ. Lalahe kóun itetí há mli. ¹⁸ Gyankpapu a, babláa mi beɛ mlitamabwé kule ní ɔpasua ámu befia. Nahogyi ání asún ánfí ku bu mótó. ¹⁹ Lélé mó á, ilehián ání nwéengyí bétsiá mlitɔ, méni mlówun ɔnɔkwaliá ibu mótó. ²⁰ Táme beblí beɛ, ní mlefia a, megyí ɔpúnúasiɔ su mlitefia. ²¹ Tsúfé mlitamagyɔ aba. Aku butegyí amú ató, butamahá aba. Mó su aku butonu bu, aku é butsie akún. ²² Mli onutó mlumá wóyíá mlitegyi ató, nu ntá mótó? Ntéɛ mlidékléá mlósupáa Bulu ɔpasua ámu, amlíwa ahiánfɔ ámu pélitɔ? Amansu mblí tsu íni iwí? Nkánfu mli? Ínitɔ mó á, ekekekeke, mméekanfú mli!

²³ Tsúfě tóá nosuán tsu anı Wíe wá kén nde mli bláa a. Anı Wíe Yesu léle bodobodo ipín onyé ámúb bele mu há ámu, ²⁴ oléda Bulu ipán, bíábía mótó, bíl ɔbéé, “Mí ɔyulúá ndepuhá mli ní. Mlitsia bwe íni pukau mísú.” ²⁵ Alı kén atogyihe amu ɔma a, olotsu ntá-ewe ámu, bíl ɔbéé, “Ntá-ewe ánfı gyı mí obugya ání Bulu dépsı ntam pɔpwe amúb ibu mli mɔnyɔ nsiné ámusu ní. Brégyıbréá mlónu mú á, mlinu mú pukau mısú.”

²⁶ Tsúfě brégyıbréá mlıdé bodobodo anfi gyı, nu ntá tsú ewe ánfıto á, mlıdé anı Wíe lowu ámu ɔkan da kpéfı bréá obéyinkı bá. ²⁷ Mú su ɔhá ání obégyı alı bodobodo anfi, nu ntá tsú anı Wíe ewe ánfıto mábú ɔkpasu á, alagyi anı Wíe ɔyulúu pú mu obugya amu iwı pón. ²⁸ Íni su ilehián ání mlóyɔ mli nwuntɔ wankláán, asa mlégyı bodobodo anfi, nu ntá-ewe ánfıto. ²⁹ Tsúfě ní mlımóbu anı Wíe Kristo ɔyulúu, mlılégyı bodobodo amu, nu ntá ámu é dínká ifınsu á, Bulu ɔbéha mli ipón mú su. ³⁰ Mú sú mlıto ahá tsɔtsɔtsɔ bapɔn, aku budelo, aku mú kúráá bawú ní. ³¹ Nı anıtɔyó anı nwuntɔ wankláán asa a, tekı Bulu méeha anı pón. ³² Táme ní anı Wíe ɔlé anı ulá, bítı anı isu á, ɔméeha anıa ɔyıtó ahá fěé ipón kole.

³³ Íni su mí apıó, ní mleyéfıa ɔpúnú ámu ası á, mlitsia gyo aba. ³⁴ Nı akún de ɔku á, ogyıi ató tsu wóyıtó asa ɔba, méni mli ifıa amu uméeti isubıtı há mli. Mı onutó néba bebláa mli tóá mlıbwée tsu ası tráhe amu iwı.

12

ɔhe Wankıhé Atokıehé

¹ Séı á, apıó, ndekléá néle ɔhe Wankıhé atokıehé asún amú ası wankláán súná mli.

² Mliyın ání bréá mlıgyı ɔmátófɔ á, bosuná mli asunakpan, uléha mlılóyɔ mlıdé ikpıá butamatóı sum. ³ Mú su ndekléá mlıbí múá itsú Bulu wá. ɔhagyıɔha ání ɔdepı

᾿᾿᾿ Wankíh  t  m etal  lw  an  W e Yesu. ᾿᾿h  an  ᾿᾿᾿ Wank h  d  mu kpa nkule ᾿betal  bl  ᾿b e, “Yesu gy  m  W e.”

⁴ Bulu atokieh   tsan- tsan bu unv, t me ᾿᾿᾿ Wank h  amv k n teye m  f  . ⁵ Bulus m agy m  igyi  tsan- tsan, t me an  W e amv k n an  f   anid sum. ⁶  kpa  tsan- tsansv Bulu t y  agy m  tsun an sv, t me Bulu  mv k n d  m  f   bwe tsun an  f  s . ⁷ Bulu tel  mu ᾿᾿   mv  wan tsun  kpa  kusv anit  okugy kv t , m n  ab pvkp  aba. ⁸ ᾿᾿᾿ Wank h  tel   kv t p  ny nsa t i kpl  ah ,  tel   kv   tel  as n. ⁹  tel   kv tel  h  Bulu gyi,  tel   kv   tets  ah  il . ¹⁰ ᾿᾿᾿ Wank h  amv k n tel   kv t mi  t p bw  of la,  tel   kv   tel  as n an  Bulu l pvw  mu  n .  tel   kv tet li b  ᾿᾿   ts  Bulu w  p  m    ts  ᾿᾿᾿ lal he w .  tel   kv tel   bl  b mb ,  kv   ton  m  as . ¹¹ ᾿᾿᾿ Wank h  amv nkule t bw  in  f  , oteye atokieh  an  h   hagy ha al  odekl .

᾿pasua  mv Igyi Nyankpusa-oy   kule

¹² Nyankpusa-oy  iw  at  it , t me m  f   l bwe nyankpusa amv. Al  k n igyi Kristo   n . Mu  pasua  mv gy  mu nyankpusa-oy   mv n . ¹³ Anit  aku anigy  Yudafo, aku Griikifo, aku nkp bi nt e ad hie, t me b pv ᾿᾿᾿ Wank h  amv b  an  f   as  w  Kristo  yol v kule amut , Bulu l pv ᾿᾿   mv k n n n  an  f  .

¹⁴ T me megy  toku kule l bwe nyankpusa-oy   mv, mbo n iw  at   tsan- tsan. ¹⁵ N  yabi  bl  ᾿b e, “Mma nyankpusa-oy   mv iw , ts f  megy  ib  ngyi”  , ilosun  an  megy  nyankpusa-oy   mv iw  at  ogy ? ¹⁶ N  isv    bl  ᾿b e, “Mma nyankpusa-oy   mv iw , ts f  megy  ns bi ngyi”  , ilosun  an  megy  nyankpusa-oy   mv iw  at  ogy ? ¹⁷ N  ns bi nkule gy  nyankpusa-oy   mv f    , nk li  b bwe ob nu as n? Nt e n  isv nkule gy  nyankpusa-oy   mv f    , nk li  b h  at  af ? ¹⁸ T me Bulu l pv iw 

atō tsətsəətsə bwé nyankpusa-oyí ámu, ə̀ɔpɔv kugyíku yi ə̀tínéá odeklé. ¹⁹ Ní iwí ntobí ámu igyi toku kule a, nkáli nyankpusa-oyí ámu ibóbwe? ²⁰ Iwí ntobí ámu itsə mú, táme mú fée lóbwe nyankpusa-oyí amu ni.

²¹ Mú sv nsibi méetalí bláa ibi ə̀béé, “Foma labi há mí!” ekekekeke. Nwun é méetalí bláa yabi ə̀béé, “Foma labi há mí!” ²² Ní akí a, iwí ató ámú anidékú aniaa ulə̀pən amu iwí téhian ni. ²³ Mú ámú anidékúá obú uma mósú ámu anitobú dvn ni. Ə̀tíné ámú anitamakleá ahá bə̀wúun amu é anitə̀pú ató tin ni. ²⁴ Táme anitamapú ató tin aní iwí ntobí ámú ibv akíle amu. Bulu lóbwe aní iwí ató ámu alí, méni abóbu mú ámú uma numnyam amu, kí mósú wankláán. ²⁵ Fówun ikulebwe bétsiá amútó, méni gyə̀pí okpítá bina a, bina é lakpítá gyə̀pí. ²⁶ Ní nyankpusa-oyí ámu iwí təkú dé ə̀sun wúun a, nyankpusa-oyí ámu fée towun mú. Ní bekánfú mótó kv é á, ansí tegyi nyankpusa amu.

²⁷ Yoo, ayó nkpa. Kristo ə̀yulə̀v kule amu mli fée mligyí. Mligyí mv ə̀pasua ámu ni. Mlitə̀ okugyíə̀kv gyí mv nyankpusa-oyí ámu iwí təkú. ²⁸ Bulu léhíhíe ínı́ fée wá mv ə̀pasua ámutə̀. Gyankpapv, sumbí ayə̀pú. Nyə̀əsi, Bulu ə̀nósú atə̀ípú, saasi, ató asunápú. Mú ə̀ma a, ofúla abwepú. Amúá bubv ulə̀tsá túmi, buale agyípú, ahande pú ə̀blí bambá ablípú. ²⁹ Amú fée gyí sumbí ayə̀pú? Ekekekeke! Amú fée gyí Bulu ə̀nósú atə̀ípú, ntée ató asunápú, ntée ofúla abwepú? Iméeba mótó alı́! ³⁰ Amú fée bv ulə̀tsá atokiehé? Amú fée téblı́ ə̀blı́ bambá, ntée amú fée tetalı́ nú ə̀blı́ bambá ámu asi? ³¹ Mlibə̀ mbódı́ amlı́dunka atokiehé ámutə̀ múbá idehian dvn.

Nélasúná mli ə̀kpa anı́ idvn ínı́ tsı́a mótó.

13

ə̀dwe

¹ Ní ntetalı́ blı́ anyánkpúsa pú Bulu-abə̀pɔv ə̀blı́ fée, táme ntamadwé mí aba á, ngyi fé ə̀kan ntée gbə̀mgbléin anı́ bude

mú da, idelín kúklókúb. ² Ní mbu Bulu onó asúnblí, Bulu asun ñáinhé bi pú hógyi kponkpontia ntetáli púpúlí abv, táme mma mí bá iwí odwe á, múmú mma labi kuv. ³ Ní nɔpú mí ató fée kíe ahiánfɔ, nɔpú mí iwí há mbée bwáa mí ogyá, táme mma mí bá iwí odwe á, mma labi há ohaa.

⁴ Ahá odwepú tenyá iklvn, obo awitole. Oma olu, otamaká onótó, otamatsú iwí. ⁵ Otobú ató, oma onsípe. Otamakósi nyá obló, otamahɔ asún wá iwitɔ. ⁶ Otamatsúlá asukpan, onokwali otobuo. ⁷ Otenyá klvn há tógyító, otahɔ asúnsú gyi. Mu ansí tedínká asúnsú, ototomi é.

⁸ Odwe mú itamatá, táme Bulu onó asúnblí bómɔ onó. Obliú bámbá blí béka itin, asúnbi é ibéba bɔtsun. ⁹ Tsúfée animókúnyá bí tógyító tá, animókúnyá blí Bulu onó asún é yi. ¹⁰ Táme onétó atokiehé ánfí fée mɔfun. Ní múá idɔfun yi ibá á, ini fée bófwí.

¹¹ Igyi fé ínu. Bréá ngyi kebi á, nɔtɔí fé kebi. Mí ató bwehé pú mí asun susúhe fée lɔbwe fé kebi. Táme séi ánfí nadan a, nasí nyebitɔ bwehé ámu fée bwe. ¹² Séi á, anidé ató kí fulaa fé ogyásitɔ anidé mú kí. Bré iku béba a, abówun mú wankláán. Séi á, aní atóbi mɔfun. Oma a, abéba bebi mú fé alá Bulu yin aní.

¹³ Onokwali a, atoku asa ánfí obétsiá ní. Hógyi, okpakú pú odwe, táme odwe dun mú fée.

14

Onye Wankíhé Atokiehé Bámbá

¹ Mludunka odwe okpa, amludunka onétó atokiehé é. Múá idun a, Bulu onó asúnblí. ² Tsúfée ní oku dé obliú bambá blí á, megýí anyánkpúsa odebiláa, Bulu odebiláa. Ohaa tamanú mú así, tsúfée mu oné dé asun ñáinhé blí. ³ Táme ohá ání ode Bulu onó asún blí mú á, ahá odebiláa, odepúbúá amú abudan hógyitɔ. Odepwá amú owonlín, odepulwíí amú iklvn é. ⁴ Ohá ání ode obliú bambá blí nkole tényá

ᾠωνλίν Bulusúmtó. Táme ᾠhá ání ᾠde Bulu ᾠnó asún blí mú tᾠwá ᾠpasua ámu ᾠωνλίν.

⁵ Teki ndekléá mli fée mléblí ᾠblí bambá, táme ní mlidé Bulu ᾠnó asún blí á, ibu mi alé dun. Tsúfé Bulu ᾠnósú ᾠtᾠpú dun ᾠblí bambá ᾠblípú. Nkétí ní ᾠblí bambá ᾠblípú ámu tetálí lé mú asi, méní ᾠpasua ámu bénya tᾠku tsú mótó. ⁶ Mí apió, ní naba mli wá séi beblí ᾠblí bambá kv, mmele mú asi á, labi mᾠmu ibówa há mli? Táme ní neblí asún, nehá mlébi asún, ntée neblí asun lesúnáhé kv, ntée neblí Bulu ᾠnó asún kv, ntée súná mli ató á, ibówa labi há mli dun.

⁷ Mlipuki itóá fedá mú itotsúlá, fé ikwe, ᾠténite ntée ᾠkre aná. Ní fumeda mú itsula wankláán á, butamanú mú asi. ⁸ Ní klunsi ᾠdapú mébi dá mú á, ᾠhaa tamanú mú asi, dídá ató yó isá. ⁹ Alí kén ní mlidé ᾠblí ání ᾠhaa méde mótó nu blí á, mlidétoí wá afútó ní. ¹⁰ ᾠblí tsᾠtsᾠtsᾠ bu ᾠyító. Kugyíku ulᾠfon, ibu mú ablípú anulé. ¹¹ Táme ní ᾠku dé ᾠblí kv blí, mí é mmedé mótó nu á, ntamanú mu asi, mu é ᾠtamanú mí asi. ¹² Mú sv íniá mlihié mlidé ᾠje Wankíhé atokiehé ámu dunká á, mlikvli múá ibówa ᾠpasua ámu ᾠωνλίν.

¹³ Íni sv ᾠhá ání ᾠteblí ᾠblí bámbá ᾠkóli Bulu mú asunu, méní ᾠbétalí le mú asi súná mú anupú. ¹⁴ Tsúfé ní ndepu ᾠblí bámbá bó mpái á, mí ᾠhé dé mú bᾠ, táme mmedé asún ání ndeblí asi nu. ¹⁵ Nkáli mee nóbwe? Nóbᾠ mpái ᾠjétó bré kvto, pú mí agywun é bó mú bré bámbátó. Alí kén nówa ulv ᾠjétó, pú mí agywun wá mú bré kvto é ní. ¹⁶ Tsúfé ní fúde Bulu kanfú ᾠjétó pé á, nkáli ibóbwe ᾠhá ání ᾠmedé mú asi nu ᾠbétsa fú? Nkáli bétsa fú Bulu ipán da ní bᾠmedé asún ání fudeblí asi nu? ¹⁷ Fíali fude Bulu ipán da wankláán, táme itamawá fú bá ᾠωνλίν.

¹⁸ Nedá Bulu ipán ání nteblí ᾠblí bambá dun mlitᾠ okugyíoku. ¹⁹ Táme ní afia a, ntekleá néblí asún anu pé ání ᾠhagyíoha obónu mú asi, ibóbvá amú é dún ání néblí asún mpím-dú (10,000) ᾠblí bámbátó ání ᾠhaa mónu mú asi.

²⁰ Mí apíó, mliwábwe agywun fé nyebí. Mliwwe iwí fé kebi-bəbwe lakpanbwetɔ, táme mligywun fé ahandɛ.

²¹ Bowanlín wá Bulu asún ámutɔ beɛ,
“Nótɔ́i tsun afɔ́sú, bébláa mí ahá əblí bambá.

Mú ó á, mí ahá bumóonu mí əmɛ.” Aní Wíe léblí.

²² Íni sv əblí bambá blí igyi osúna há əmátɔ́fɔ, megyí ahógyipv. Bulu ənó asún blí é igyi osúna há ahógyipv, megyi əmátɔ́fɔ.

²³ Ní əpasua ámu ifia, əhagyíəha dé əblí bambá blí, əha bambá pú əmátɔ́yín bebá mliɔ á, buméəblí beɛ, mli nwun layíntá? ²⁴ Táme ní mli féé mli dé Bulu ənó asún blí, əmátɔ́fɔ ntée ahá aní butamanú mútɔ́ bebá mliɔ á, amú onutó bóyɔ asún ámutɔ, nú iwiasí aní babwé lakpan.
²⁵ Ibéha amú klvntɔ asún bəlun əwan, béda akpawunu, kánfó Bulu beɛ, “Lélé, Bulu bv mliɔ.”

Əpasua Ámutɔ Nhuhé

²⁶ Mí apíó, ní mlebá befia Bulu osúmkrpá, mliɔ əkv tɔwá ulv, əkv tosúná ató, əkv towun ató, əkv teblí əblí bámbá, əkv é tonú mú así á, bubwée mú pwa əpasua ámu əwunlín.

²⁷ Ní aku béblí əblí bámbá á, bubwée ahá abanyó. Ní butɔ́ kúráá á, abasá. Bvblí mú ikule-kule, méni əkv əbéle mú así. ²⁸ Ní əhaa má ofiakpa unvá əbéle mú así mú á, bukpa ənó bun, amú amú Bulu abutəi nklobító. ²⁹ Bulu ənósú atɔ́ipú abanyó ntée abasá butó, atráhe abuyɔ amú asun blíhé amutɔ. ³⁰ Táme ní Bulu əlé ató súná əkvá otsie ofiakpa unv á, Bulu ənósú atɔ́ipú ámu osíi tɔ́i, əhá ámu əblí t́á alawun. ³¹ Mli féé mlétalí blí Bulu ənó asún ámu ikule-kule, méni mli féé mlósuán tɔku tsú mútɔ́ pówá iwí əwunlín. ³² Bulu ənósú atɔ́ipú amv bunyáa túmi əjé ámúv ide amú kpa amósú, méni bótɔ́i há amú aba əkpa. ³³ Tsúfé Bulu asún lolwíi, omegyí basabasa.

³⁴ Ní əpasua ámu ifia a, atsi bubwée díín. Buma əkpa t́i. Bvbá iwiasí fé alhá Mose Mbla léblí. ³⁵ Ní budekléa bónu

asvankutō á, bufíte amú akúlu wóyító, tsúfé ibu péliá ɔtsi ɔbótóí ofiákpa.

³⁶ Mlilahogyi mliaa, mli wá Bulu asón ámu ilotsuá asi? Ntéé mli nkule látsɔ mó nu? ³⁷ Ní ɔku dékíú ání Bulu ɔnósú ɔtáípu mgyi, ntéé ɔbu ɔhétó atokiehé ku á, iwánku mu ání aní Wíe onutó mbli ígyi ndewanlín sísí mli. ³⁸ Ní ɔmòhɔ asón ánfí á, mli é mlumáhɔ mu asón.

³⁹ Mí apió, íni sv mlipri ání mléblí Bulu ɔnó asón, táme mlumábláa ɔhaa mliaa, ɔmáblí ɔblíu bambá. ⁴⁰ Mlibwe tógýtó dunka mó ɔkpasu wankláán, ifun.

15

Kristo Kvsú tsú Afúlito

¹ Mí apió, séi á, nkáun mli asun wankláán ámúbú neda mó ɔkan súná mli, mlilóhɔ músú gyí, mli hógyi ilí músú ámu.

² Asón ánfí ɔbéha mli nkpa ání itamatá, ní lélé mlilóhɔ músú gyí ni. Táme ní mlekíná músú hogyi mó á, mli hógyi labwé kpaali!

³ Tsúfé asón ání ihíe dehián bəpυhá mí nəpυba mli ígyi. Múgyí, Kristo lóbowu aní lakpan sv, fé aliá Bulu asun wanlínhé amu léblí. ⁴ Bopulá mu, Bulu lókusúa mu tsú afúlito eke sáási fé aliá Bulu asun wanlínhé amu íleblí. ⁵ ɔlele iwí ɔwan súná Petro. Mú ɔma a, ɔlele iwí ɔwan súná sumbí ayɔpú dúanyɔ ámu féé. ⁶ Íni ɔma a, ɔlele iwí ɔwan súná mu abúopu tsɔtsɔtsɔá budun ahá lafanu (500) ɔtsáwule. Amótó aku bawú, táme ɔdudɔɔ butráa butsie nkpa. ⁷ ɔlele iwí ɔwan súná Yakobo é. ɔma a, ɔlele iwí ɔwan súná sumbí ayɔpú ámu féé.

⁸ Itráhe-tráhe a, ɔlele iwí ɔwan súná mí onutó ánfí nesin ɔma ba anfi. ⁹ Tsúfé mígyí sumbí ayɔpú ámutɔ ɔkusu ni. Teki mmɔfun ání bétí mí sumbí ɔyɔpú kúráá, tsúfé nedunká Bulu ɔpasua ámusu. ¹⁰ Táme Bulu awítale sú nde namlí alí. Mu awítale amu umòbwe kpaali. Tsúfé nayó agyómá dvn amótó okugyíáku. Táme megyí mí ɔwonlín nəpυyó mó.

Mu awitōle amu dé mí kpa. ¹¹ Ínu su ní mílétrá da asún ámu òkan o, amú o, múá idehián gyí mlilóhò aní asún ámusu gyí.

Ani Kusú Tsú Afúlitò

¹² Ní anitèdá Bulu asún ámu òkan aniaa, Bulu lókúsúá Kristo tsú afúlitò á, ntogyi sò mlitò aku mú bæe, awupú bumóòkúsú tsú afúlitò? ¹³ Ní awupú bumóòkúsú mú á, idesuná ání Bulu mókúsúá Kristo é. ¹⁴ Ní Kristo mókúsú tsú afúlitò á, tekí aní asun wankláán amu òkanda igyi kpaali. Mli músú hogyi é igyi kpaali. ¹⁵ Ní Bulu tamakúsúá awupú mú á, mómmú afunu anidéwa tìn Bulu ònó, blí aniaa alakúsúá Kristo tsú afúlitò. Ní òtamakúsúá awupú á, mómmú asún ánfí uma mótó. ¹⁶ Ní òmóòkúsúá amú mú á, mómmú òmòkúsúá Kristo é ní. ¹⁷ Ní òmòkúsúá Kristo a, mómmú kpaali mliláhò mu gyí. Idesuná ání mlilasin lakpantò. ¹⁸ Mómmú itráa desuná ání Kristo ahógyipwá bawú é bafwí. ¹⁹ Ní òyí ánfítò nkpa nkòlesó aní ansídín Kristosu mú á, mómmú aní ilá bu nwe dun òhagyíòha.

²⁰ Táme òòkwálá ida gyí, Bulu lakúsúá Kristo tsú afúlitò. Kristo labwé ahá ání Bulu òbókúsúátò ogyankpapu. ²¹ Alí ámúú lowu léba tsun nyankpusasu ámu a, alí kén kúsú tsú afúlitò é iléba tsun nyankpusasu ní. ²² Tsúfè alí ámúú ahá butowú amúá Adam ikòlèbwe su ámu a, alí kén amúá Kristo ikòlèbwe su amú fèé bénya nkpa ní. ²³ Táme anitò okugyíòku bu mu bré. Kristo Bulu légyankpá kúsúá tsu afúlitò. Ní Kristo oyínkí bá a, mu é òbókúsúá mu ahá fèé. ²⁴ Mú òma a, Kristo obégyi òhétó túmi laláhe, iwíegyi pú túmiá ide òyísú gyí fèésú asa òyí òbómò ònó. Mú òma a, obéyinkíá iwíegyi ámu wá aní Sí Bulu ibitò. ²⁵ Tsúfè ilehián ání Kristo obégyi iwíe kpéfún bréá alagyi mu alupú fèésú, pú mu ayabi tsá amúsú. ²⁶ Olupú tráhe ání òbèhí gyí lowu. ²⁷ Tsúfè Bulu asun wanlínhé amu ilèblí òbèe, “Bulu lópu tógýtó wá mu asi.” Ínu imosuná ání Bulu bu Kristo

asu. ²⁸ Ní Kristo ogyi tógyítósú tá á, ɔbópu iwɪ wá Bulu asu. Móléha mu túmi dínká tógyítósú, fówun Bulu é obégyi tógyítóá ibu ɔtínegyíɔtínésú.

²⁹ Ní Bulu móɔkusúa awupú á, ntogyi sù ahá buɔe asú bɔ há ahá ání bawú? Ntogyi sù béha bɔbɔ amú asú há amú?

³⁰ Ntée ntogyi sù anɪ mú abópu anɪ nkpa pléi brégyíbré?

³¹ Mí apíó, nekáse, ntefia alowusu ekekegyíeke! Igyi tóá ntɔpútsú iwɪ ání mliha anɪ Wíe Kristo Yesu mliabwé ukule.

³² Mú su kpaali nɔkɔ Efesofáa bugyi fé mbwíkítá-atɔ? Ní Bulu móɔkusúa awupú mú a, “Mómú mliha agyi, awɪ, anu, tsúfé ɔke sesebre anilawú.” Fé alíá bɔwanlín wá Bulu asún ámutɔ.

³³ Mlumáha ahá ání butebli asún ánífu odu abumle mli! Tsúfé ahande bee, “Mba laláhe gyi teyintá ɔha.”

³⁴ Mliabwɛ agywun wankláán, amlisi lakpan bwe. Tsúfé mliɔo aku butépi bumeyín Bulu. Nde asún ánífu wanlín sísí mli púsúpa mli.

ɔyulúúá Abópukúsú Tsú Afúlito

³⁵ ɔku ɔbéfité ɔbéɛ, “Nkáli Bulu ɔbókusúa awupú? ɔyulúú mɔmɔ bópukúsú?” ³⁶ ɔha mimláhe! Bi ání ní fodú ató-abí á, itɔpló asa itɔkwe. ³⁷ Megyi itóbí ámúú fɔpuwá ɔsulúto ámu gyi ɔbán amúú itedan amu. ³⁸ Bulu tehá mú ɔyulúú pɔpwe ání mu onutó odeklé. ɔtehá ató-abí kugyíku mú ɔyulúú ɔtsan.

³⁹ Alí ámúú ató-abí ɔtsan-ɔtsan búu unu ámu a, alí tógyító ɔyulúú igyi ɔtsan ní. Anyánkpúsa, mbwi, mbubwi pú ntsutso aye féétó okugyíku ɔyulúú ɔtsan.

⁴⁰ ɔsúsú-ató bu unu, ɔsulúsu-ató é bu unu. Mú féé ibu ɔyulúú ɔtsan-ɔtsan. ɔsúsú klé numnyam ɔtsan, ɔsulúsu klé é numnyam ɔtsan. ⁴¹ Owí numnyam igyi ɔtsan há ɔtsra. ɔtsra klé é igyi ɔtsan há ntsrakpabi. ɔtsrakpabi kugyíku ná ɔtsan, mú numnyam é una ɔtsan há mú bá.

⁴² Alí íbóbwe bréá Bulu òbókúsúa awupú ní. Aní òsulúsu-òyulú anfi itowú, pló ánfí íbòtsun òtsan há múbá Bulu òbókúsúa tsu afúlító, tsúfé mú mú imóowu ekekεεκε. ⁴³ Aní òyulú anfi tōpōn bréá bopúlá mú, táme ní Bulu òkúsúa mú á, itenyá òwonlín, wá numnyam. ⁴⁴ Òsulúsu-òyulú igyi séí, táme ní Bulu òkúsúa mú á, íbóbwe òηέτό òyulú. Tsúfé alí ámú òsulúsu-òyulú bu unu ámu á, alí òηέτό klé é bu unu ní. ⁴⁵ Bulu asun wanlínhé amu lébláa aní òbée, “Adam gyankpapu amu lóbwe òkiankpapu.” Táme Adam tráhe, ogyi Kristo amu mú gyí òηέα òtehá nkpa. ⁴⁶ Òsulúsu-òyulú antegyankpá nyá asa antebenya òηέτό klé. ⁴⁷ Òsulútō-isi Bulu lópupwé nyankpusa gyankpapu, ogyi Adam amu. Kristo, amú obuo amu mú otsú òsúsú. ⁴⁸ Nyankpusa okugyíoku bu òsulúsu-òyulú fé Adam, táme aní òsúsú-òyulú mú bóbwe fé Kristo klé. ⁴⁹ Alí ámú anígyí fé òsulúsu Adam amu a, alí kén abóbwe fé Kristo amú otsú òsúsú ámu é ekekó ní.

⁵⁰ Apíó, tóá ndeblí gyí, aní òyulú anfi igyi òyulú múbá obugya anfi iméenya ogyíkpá Bulu iwígyí ámútō. Tóá iteyíntá uméetalí nyá ogyíkpá tóá itamayíntátó.

⁵¹ Táme mliyaa asu amlinu asun ηáínhé kuá Bulu lalé súná mí. Òbée, megyí aní féé obówu, táme aní féé òyulú bétse. ⁵² Ní òkpe tráhe ífúlí pé á, aní féé abétse òtsáwule pé. Bulu òbókúsúa awupú ámu. Amú òyulú uméetrá yintá, òbétse aní nkpa atsiápó é féé. ⁵³ Tsúfé ilehián aní Bulu òbétse aní òyulú anfi itowú pló ánfí, há aní òyulú itamawú, itamapló. ⁵⁴ Ní íbá mútó aní Bulu latse tóá itowú, bwé mú tóá itamawú, tóá itōpló é lábwé tóá itamapló á, unú Bulu asun wanlínhé anfi íbēba mútó ní. Òbée, “Batú lowu asu plíplíplíplí. Isugyí onutó laba.”

⁵⁵ Bulu asun wanlínhé ku é léblí òbée, “Óo lowu, nkúnv fú òkpe bu?

Nkúnú fú isugyí bu?”

⁵⁶ Lakpan igyi ɔkpe ání utómó, Mose mbla ámu é itehá lakpan túmi. ⁵⁷ Nkálí kúráá abókuku da Bulu ipán? Móláhá anilatsun aní Wíe Yesu Kristosu gyi asu.

⁵⁸ Mú su apíó adwepú, mlilu kínkíínkín, mlumákpunkí. Mlisi mli iwí fée ha Bulu agyómá brégyíbré, tsúfé mliyin ání mli gumagyihe móɔbwe kpaali.

16

Itswitswi Ha Yerusalem Ahiánfɔ

¹ Itswitswi ha Bulu ahá ání bubu Yerusalem asún ámu é á, mlibwe mú fé alí ámúú nebláa ɔpasua ámúú ibubu Galatia ɔmátó mbée bubwée mú ámu. ² Ɔhagyíɔha ɔkú mu kóba alíá otenyá ɔnó, ɔle ku yai Kwasiédagyíkwasieda. Mlumágyo mlíaa mbá asa amltswitswi mú. ³ Ní nebá á, nówanlín nwulú há ahá ání mli onutó mléle mlíaa, bupúv ató ámu ya Yerusalemfɔ ámu, púlé amú súná amú. ⁴ Ní ibv aléá nóyɔ á, múmú bóbuo mi yó.

Paulo Ɔkpatu Nhíhié

⁵ Ní nókúsú tsú Makedonia a, néba mli wá, tsúfé ndekléá nótsun unv asa néba. ⁶ Fíali nétsiá mli wá kpalobí. Fíali kúráá nétsiá unv nyankpu mba atsalí bré ámu fée, fówun mlilasí mí ɔkpa nayó ɔtínegyíɔtínéá nóyɔ. ⁷ Séi mú á, mmedékléá néba beka tsun mli wá keke. Ní Bulu lótsulá á, nétsiá mli wá kpalobí.

⁸ Táme nétsiá Efeso nfi kpéfun Pentekoste eke ámu. ⁹ Tsúfé ɔkpa kpɔnkpɔnti lafínkí há mí ání nóyɔ agyómá ání íbɔwa labi. Ibv mútá mí alupú tsɔtsɔtsɔ bubu nfi mú.

¹⁰ Ní Timoteo owíé mli wá á, mlumáha ifú ikuta mu, tsúfé aní Wíe agyómá ámu kén ɔdeyɔ fé mí. ¹¹ Mlumáha ɔhaa ɔkú mu ansító kótíkótí. Mlisi mu ɔkpa wankláán oyinki bɔtv mí, tsúfé ntsie ngyo mva aní apíó atráhe amu.

¹² Aní pío Apolo asún ámu a, nalíi musu mbéé, obúo apío ámu ba mli wá, táme omedékléá obéba séi. Ní onyá okpa á, obéba.

Asún Tráhe

¹³ Mlida iwisu, amlilu kínkíínkín mli hógyito. Mliwa klun, amlwa iwí owonlín. ¹⁴ Mliwu odwe bwe mli tógyító.

¹⁵ Mí apío, mliyin aní Stefana mua mu wóyító ahá gyí agyankpapwá bedamlí kluntō Akaia nsáuntō. Basí iwí há, bude Bulu ahá ámu súm. ¹⁶ Nokókóli mli, mliba iwiasí ha amúa ahá aní béba betsiá amótō, bópu nsi yó agyómá ámu.

¹⁷ Ansí lagyi mi aní Stefana mua Fortunato pú Akaiko baba mí wá. Tsúfé bude mli obwekpa bwe. ¹⁸ Bawá mí atetō-onlun wankláán, fé alí ámúbō bowa mli ámu. Mlibu ahá ánfí odu.

¹⁹ Opasua ámúbō ibu Asia amu féeé bude mli tsiá ha. Akwila mua Priska pú opasua ámúbō ibu amú wóyító amu é behá mli tsiá wankláán aní Wíe idátō. ²⁰ Apío aba ámu féeé behá mli itsiá gyágyáágyá.

Mlilata aba puta Kristotō.

²¹ Mí Paulo onutō lapó mí ibi wanlín ín, ndepuhá mli tsiá.

²² Ní oku tamadwé aní Wíe Yesu a, ilwí din musu!
Marana-ta! (Mó así gyí, “Aní Wíe, ba!”)

²³ Aní Wíe Yesu Kristo ogyíi mli buale.

²⁴ Ania aní Wíe Kristo Yesu ikulebwe su ntehié dwé mli féeé. Amen!

Bulu ntam pɔpwe; Nkonya
New Testament in Nkonya (GH:nko:Nkonya)

copyright © 2010 Wycliffe Bible Translators, Inc.

Language: Nkonya

Translation by: Wycliffe Bible Translators, Inc.

Nkonya

nko

Ghana

Copyright Information

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Nkonya

© 2010, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 13 Mar 2019 from source files dated 13 Mar 2019

01b09958-fa53-51d1-aae0-88c7e9302503